



**Spezi Clique 1905
Jungi Garde**

Fasnacht 2018

JUNGI GARDE

Einhornisiert - hesch kaini andere Probleme?

Es git allewyy! me glaubt das kuum,
jedes Joor e neye Boom
by Klaider, Schueh und au der Sprooch,
als Alte kunsch do nümme nooch.
Do wird d Junte als Faane ghandlet
und d Hoor numme no mit Gel behandelt,
uff jeeder blutte Stell e Tattoo gmoolt,
a Ässe wird gliiferet und nimme ghoolt.
Im Winter nimme vorusse zittere
sondern dinne chille, WhatsApp und no twittere.
Au neyi Wörter gits, me ka si kuum verstoo
EINHORNISIERT isch ains dervoo.

Das Wort bedyttet und das duet d Närke koschte,
hesch kaini andere Brobleem du Pfoschte!
Do saisch ganz aifach bisch EINHORNISIERT
denn waisch bisch numme uff di sälber fixiert.
Was interessiert mi denn die Wält
es hett jo noon! fünf vor zwölfi gschällt.
Y ha my Natel in der Hosedäsche,
d Wesch wird deheim vo der Mamme gwäsche.
Es macht au nyt bin ich emol grangg,
well s Sagggäld kunnt jo eh uff d Bangg.
Dorum wird y au nie kritisiert,
well y bi EINHORNISIERT.

Me weiss grad gar nyt vom richtige Lääbe
und blybt aifach in sym Innere klääbe.
Was interessiere mi do d Russe,
die sinn eh ganz wytt im Oschte usse.
Apropos, das weiss doch e Jeede,
hört sich der Putin au gärn reede.
Maischtens goots denn nur um lin,
das zyygt au vo kaim grosse Hirn.
Me gseht en maischtens au ellai
ob uff der Strooss oder dehai.
Vo der ganze Wält wird är denn kritisiert
au dä Egoischt isch EINHORNISIERT

E Jeede läbt für sich elai
in synere Wält, die isch ganz glai.
Deert inne fyyt me sich ganz toll
isch der Scheensch und Grescht und wundervoll.
Doch luegt me denn emol au nach uuse,
duet s aim vor sovyyl Spinner gruuse.
Do git s e glaine digge Maa
in Nordkorea mit ere Kappe aa.
Dä haisst schyynts eerlig Kim Jong-Un,
do sait der Namme scho dä Maa isch dumm.
Der roti Knopf isch s einzig was lin interessiert.
Das macht aim Angscht so EINHORNISIERT.

Me dänggt jetzt schnäll s goot nymme schlimmer,
doch glaubet s mir das goot fascht immer.
Lueg emol nach Weschte zue de Ami,
deert gits der greeschti Perigge-Dummy.
Grad gar nüt was dä macht und duet
isch fir unser Lääbe wirklich guet.
Aizäller sait me lim schyynts au,
die zwaiti Zälle het si Frau.
Denn was dä Depp duet ständig twittere
losst unsere Wält-Friide erzittere.
Y hoff das wird bald realisiert
das dä EINHORNISIERT nur klaar verliert.

Au do z Basel wird das kritisiert
me syg scho lang EINHORNISIERT.
Lueg nummen emol uff der Stroosseverkeer
do wird s ooni Velo zimmlig schwäär
alli Basler Ample wärde zämmegschalte
bi jedem Rotlicht muesch e halb Stund halte.
Ganz Basel isch e Baustell worde
und d Regierig erwartet für das au no e Orde.
Die solle sich emol iiberleege
ob de mit em Velo kasch Asphalt verleege
oder der Wienachtsbaum im Roothuus inne
söll ney der Velokurier schyynts bringe.
Die regiere numme no grien fixiert,
die sind ganz schlimm EINHORNISIERT

S wird langsam Zytt, das Horn jetzt z bräche
und äntlig wiider Klartäggscht z spräche.
D Problem vo däre Wält jetzt registriere
und Leesige für alles produziere.
Doch machet das nit ganz ellai,
denn zämme sinn mer gross und nimm so glai.
Der blau Planet muess grettet wärde,
denn das isch unseri Zuekunft, unseri Äärde.
Well au d Fasnacht isch nimme EINHORNISIERT,
sondern als Wältkulturerb regischtriert.
Dorum wachet uff und stöönd jetzt yy
mir sind stolz e Spezi z syy.

Am Fryttig-Nomidaag, em 23. und am Samschtig, em 24. Februar
dien sich die Jungi Garde uff em Barfi vorstelle und hoffe uff vyy!
Bsuecher und Jungi, wo Inträsse hänn.

Druggerey: Werner Drugg & Medie AG